

EFESIOS

Pablo queédih ã túyat tútat

¹ Weém, Pablo, biíhdih daacát túatna, yeéb Éfeso tútchidih moón Jesúíhwādh wã wahna caá. Dios ã náahat pah Jesucristo weemdíh ãih túini doonádih ã naáwát túatni caá. Yeéb Jesucristodih túi jenah jói cádahcannitdih wã daác wahna caá.*

² Jwĩ íp Dios, jwĩ Maáh Jesucristobat, yeebdíh oinit, í túi teo wáaca naáh, caán biícđih ñi túi jummat pínah niijná. Weembát yeebdíh búdí wã túyat túatna caá.

Jwiít Cristoíhwādh Dios ã túi chājat

³ Jwiít Cristoíhwā caán biícđih jwĩ jumuchah, Dios, jwĩ Maáh Jesucristo íp, jwĩh caolihdih búdí ã túi chājna caá. Páant ã túi chājachah jéihnit, caandíh búdí jwĩ wēi naóhna caá.

⁴ Jwiít áihwādh nin pah Dios át chājap wut jĩ. Nin baácđih ã chājat pínah jātih, Jesucristo biícđih jwĩ jummat pínah, yéejat wihcannit ã enechah jwĩ jummat pínahbat niijná, jwiítđih átát ñíoqip taga. Pánihna, jwiít Jesúsđih jepahnitđih, “Ma yéejat jíib jumna caá”, jwiítđih ã niijcán niít.

⁵ ã náahat pahjeh jwiítđih oinit, jon jātih nin pah Dios át niijíp wut jĩ: “Wã wūh Cristo ã chājatjĩh queét wã weh í jumbipna caá”, át niijíp wut jĩ.

⁶ Pánih oinit, jwiít ã wūh ã oiniíhwā jwĩ jumuchah, Dios jwiítđih búdí pohba át túi chāj

* **1:1** Hch 18.19-21; 19.1

wūhup taga. Páant ã chājatdih jenah joinít, caandih páantjeh búdí jwī wēi naáwát caá náahap.

7-8 Cristo jwī yéejat jíib buudáát panihnidih jíib chājna, āih meépdih yohnit, át wun wūhup wut jī.* Pánih wun wūhna, jwiít iiguípna jwī bejat déedih táí ubnit, Satanás ã chéwat tōp panihnidih át watap wut jī. Pánihna, Cristo jwī yéejat jíib ã wūhatdih jéihnit, Diosboó jwī yéejatdih át yoh wūhup wut jī.* Jwiít dih búdí oi jīgah ennit, ã jéih beedáátjīh ã wūúhdih páant át táí chājat túutap wut jī.

9-10 Jon jātih ã jenah joyátjidih cāacwādh ã jéihya jwuhcan yahna, buu jwuhna Dios jwiít āihwāboodih át beh joyánap taga. Nin pah caá ã jenah joyátji: Cristo nihat ã chājatjīh, nihat japboó jumnit, nin baácboó jumnit, nump bóo tólihboó jumnitdihbut Dios ã ñíoni yeó jáapdh Cristodih maáh ã waadábipna caá. Páant maáh ã jumuchah, nihat āih míc ã jumbipna caá. Dios páant ã chājat pínahdih át wutap wut jī.

11-12 Dios ã náahat pahjeh nihatdih chājnit, jwiít judíowā Cristodih jwíih jepah waóhnitboó jwī táí chājat pínah niijná, bitabut Diosdih ĩ wēi naáwát pínah niijná, jon jātih jwiít dih át ñíwip wut jī.

13 Yéejat jíib iiguípna ñi bejat déedih Jesús ã wun wūhatji doonádih joinít, yeebút ñitát jepahap taga. Pánih jepahnit, Jesúhwā ñi jumuchah, Diosboó ã naóhniji Túini Espíritudih yeebdih át wahap taga. Pánih wahnit, āihwā ñi jumatdih ã júutna caá.*

* 1:7-8 Mr 10.45; 14.24; He 9.12-14 * 1:7-8 Col 1.14 * 1:13 Lc 24.49; Jn 14.26; 16.13-15; Hch 1.4; 2.33

14 Nin baácboó jwĩ jum jwuhuchah, Túini Espíritu jwiít dih Dios ã jwĩh wãhni caá. Pánihna, ã pebhboó jwĩ juibínachah, jwiít ni hatdih túut nuúm péanit, ã bíboh páinidih ã wãh beedábipna caá, ã wūt chah yáaat pínah niijná.*

Pablo Jesúhwãdih ã uúbát

15 Páant ã chãjatdih jéihnit, Jesús dih ñi túi jenah joyát doonádih joinít, ni hat bita Jesúhwãdih ñi oyat doonádihbut joinít,

16 Dios dih uúbh cádahcan, “Queétdih ma teo wáacat túina caá”, wãpĩ niijná caá.

17 Nin pahbut jwĩ Maáh Jesucristoíh Dios dih wãpĩ ni j uúbhna caá: “Paá, meém chah wẽpni jumna, queétdih ded pah ma jummatdih ma jéihyanaá, meemdíh chah ñi túi jéihyat pínah niijná”, wãpĩ niijná caá.

18 Nin pahbut wãpĩ ni j uúbhna caá: “Queétdih túut nuúm jwĩhna, ma pebhboó ñi juibínachah, ma túut nuúm péaat pínahdih ma túi beh joyánaá. Jwiít míihwã caanná jwĩ juibínachah, chah búdí ma túi chãjat pínahdihbut, ma jéihyanaá”, wãpĩ niijná caá.

19-21 Nin pahbut wãpĩ ni j uúbhna caá: “Ded pah búdí ma wẽpat ã jummatdih queétdih ma jéihyanaá. Caán wẽpatjĩh Jesucristodih booanit, ma jéihyepmant bóo buwámant chúudat túutnit, maáh mat waadánap taga.* Pánihna, caanjĩh chúudna, ni hat maátadih maáh ã jumna caá. Bũ lãa, túttimah bóo láabut páantjeh chah maáh ã jumbipna caá. Jwiít caandíh túi jenah joinít dih caán wẽpatjĩh ma

* 1:14 2Co 1.22 * 1:19-21 Sal 110.1

teo wáacatdih queétdih ma túi beh joyánaá”, wāpī niijná caá.

²²⁻²³ Páant chah wēpni ā jumuchah, Diosboó nihatdih Jesúsdih āt wutat túutup taga.* Pánih chājnit, Jesúsdih wao dáh panihni, āihwādih āih b́acah panihnibut āt chājap taga.* Pánihna, jwiít āihwājeéh jumni nihat pehbboó ā jumuchah, āih b́acah panihni jumna, ā wēpatdih jwiítbut jwī bíbohna caá.

2

Jīb náahcanjeh, Dios jwiít dih ā túi ubat

¹ Yeébbó Jesúsdih ñi jepahat pínah jātih, yeejép ñi chāj jwuhuchah, Diosboó yeebdih wannit panihnit pah āt enep taga.

² Jātih nin pah ñit jum jwuhup taga: Diosdih yap yohnit ī túi chājcat pahjeh, biíc yoobó mantih yeebbút yeejép ñit chāj jwuhup taga. Pánih chājna, nemépwā ī maáhboó ā wutatdih ñit jepah jwuhup taga. Caán nemépwā ī maáh Dios ā wutatdih yap yohni buu ĺaa nin baácboó jumna, cāacwādhbut Dios ā wutatdih ā yap yohat túutna caá.*

³ Jātih jwiít nihatbut caan páh jwī chāj jwuhup jī. Dedé jwī weñat pínahdih, jwī yéej jenah joyátdihjehbut jwī chāj jwuhup jī. Páant jwī chājachah ennit, Diosboó jwiít dih íjnit, nihat bita yap yohnit biíc dih, ātih peéh chājap ta yah caá.*

⁴ Obohjeéhtih, páant jwī jumuchah yahna, Diosboó jwiít dih b́adí āt oyop taga.

* **1:22-23** Sal 8.6 * **1:22-23** Col 1.18 * **2:2** Ef 6.11-12; Col 1.13

* **2:3** Col 3.6

5 Pánih oi jǵgah ennit, boonit panihnit pah jwiít dih át chǵjap taga. Yéej chǵjnit, wǻnnit panihnit jum jwǻhna, Jesús dih jwǻ jepahachah, caán biíc dih Diosboó jwiít dih át boonanap taga. Yeejépwǻ jwǻ jumǻchah yǻhna, Dios bádí oi jǵgah enni jumna, jwǻ yéejat jíib iiguípna jwǻ bejat déedih jwiít dih át túi ǻbǻp taga.*

6 Cristodih boosana, caán biíc dih jwiít dihbat át boonanap wut jí. Cristodih ǻ boosana tǻttimah, caandíh ǻ pebhboó chǻudat tǻutnit, jwiít ǻihwǻ caán biíc dih jumna, ǻjeéh maáta jwǻ jummat pínah niijná, jwiít dihbat ǻ pebhboó Dios át chǻudat tǻutǻp wut jí.

7 Pánih chǵjna, jwiít Cristoíhwǻ dih ǻ oi teo wǻacat, débóo bádí ǻ jummat dih nihat dih ǻ júutbipna caá.

8 Cristodih jwǻ túi jenah joyóchah, Dios bádí oi teo wǻacni jumna, jwiít dih ǻ túi ǻbna caá. Nindih ní túi náhninaá: Ded pah jwǻ túi chǵjachah yǻhna, jwiít míicjeh jwǻ jéih túi ǻbcan caá. Obohjeéhtih, Diosboó jíib náahcanjeh jwiít dih át túi ǻbǻp taga.

9 Dedé jwǻ túi chǵjat jíib nihcan, jwiít dih át túi ǻbǻp taga. Pánihna, “Wǻ túi chǵjat jíib weemdíh át túi ǻbǻp taga”, ded ǻ jéih níicán caá.

10 Obohjeéhtih, jwǻ túi chǵjatjí jíib túi ǻbcan yǻhna, jwǻ túi chǵjat pínah níijná, jwiít dih át túi ǻbǻp taga. Ded pah jwǻ túi chǵjat pínah dih játih átát jenah joijíp taga. Pánihna, Jesúsíhwǻ jwǻ jumǻchah, ded pah ǻ jenah joyátjí pahjeh, túi chǵjat caá náahap.

Jwiít Cristoíhwǻ jumna, biíc dih jwǻ túi jummat

* 2:5 Col 2.13

11 Nindihbut ñi náhninaá: Jãtìh yeéb judíowã nihcannit, Dioíhwã ñit jum jwuhcap taga. Páant ñi jumachah, jwiít judíowã quehli nah yapat chóodih bóodnit, Dioíhwã jumna, yeéb bóodcannitdih jwĩ íí en jwuhap jĩ. Obohjeéhtih, cáacwãjeh jwiítidih í bóodochah, Dioíhwã jwĩ jummatdih júutat pínah ã jumachah yahna, dawá wã déewã Diosdih í joyáh bojna caá.

12 Nindihbut ñi náhninaá: Jãtìh Dios ã wahnì Cristodih ñit jéih jwuhcap tajĩ. Jwiít judíowã Dios ã ñíonitdih mácah jumna, Dios jwiítidih ã naáwátjidihbut ñit jéihcap tajĩ. “Weemjéh tigaá ñi Maáh. Yeébboó wíih cáacwã ñi jumna caá. Pánihna, weém yeebdíh wã túi chãj wãhbiipna caá”, Dios jwiít judíowãdihjeh át níj naáwáp tajĩ. Yeéb judíowã nihcannitboodíh át níj naóhcap tajĩ. Pánih jumna, ded pah ñi yéej chãjat peéh, yeebdíh túi ubni pínahboodíhbut ñit jéih jwuhcap tajĩ. Diosdihbut yúup jumnit panihnit ñit jum jwuhap tajĩ.

13 Obohjeéhtih, buu jwuhna, Cristodih jepahna, ã yoh wãhni meépjìh yeéb yúup jumnit panihnitjidih, pehbbit jumnit panihnit Dios át chãjap tajĩ.

14 Jesucristojeh jwiít chéne poómp jumnitjidih biíc poómp pah át chãjap taga. Jwiít judíowã, yeéb judíowã nihcannitbut jãtìh tãbit míic eníhcannit jwĩ jumachah yahna, Jesús wan wãhna, jwĩ míic íjatji jãhat panihnidih, át yoh wãhup tajĩ. Páant ã yohochah, jwiít ãih bácah panihni jumna, biícidih jwĩ túi jumna caá, buca.*

15-16 Jãtìh jwiít judíowã Diosjeéh túi jummat túut

* 2:14 Jn 14.27

niijná, Moisés ã wɔtatjidih jwĩ túi jepah beedáhip yuh jĩ. Obohjeéhtih, caandíh jwĩ jepah beedácatji jíib bádí peéh chãjat jwiítidih ã jamap jĩ. Pánihna, buu Cristo jwiítidih ã wun wãhatdih túi jenah joiná, Diosjeéh jwĩ túi jamna caá.* Pánih wun wãhnit, caán peéh chãjatdih ãt ubap wut jĩ. Jwiít chéne poómp jamnitjidih biíc poómpjeh, ãih bácah panihni chãjna, biícidih Diosjeéh jwĩ túi jamat pínah niijná, ãt wun wãhup tajĩ.*

17 Cristo nin baácboó dei jãóhnit, ded pah Diosjeéh jwĩ túi jamat pínah doonádih ãt ub jũwáp tajĩ. Pánih dei jãóhniji jwúub páuh laab béjna, yeéb judíowã nihcannit Diosdih yuúp jamnit panihnitdih, jwiít judíowã caandíh pehbbit jamnit panihnitdihbut, caán doonádih ãt naáwát túutur wut jĩ.*

18 ã wun wãhatjĩh jwiít chéne poómp jamnitjidih jwĩ íp Dios ded pah ã jamatdih ãt jéihyanap tajĩ. Páant ã jéihyanachah, Túini Espiritu jwiít nihatdih biíc yoobó ã teo wáacatjĩh úmcanjeh Diosdih jwĩ túi jéih úbhna caá.

19 Pánihna, yeéb judíowã nihcannit, jãtjih Diosdih jéih jwuhcan, jwĩ déewã nihcan yuhna, buu yeebbát Jesúsdih jepahnit, Dios ã weh ñi jamuchah, jwiít nihat biíc weh pah jwĩ jamna caá.

20 Jwiít nihat biícidih Dios ã chãjni muu pánihni jwĩ jamna caá. Jesús ãih túini doonádih naáwát túutnit, Dios naáwátidih naóh yapanit biícidih, Dios ã chãjni muú wêp teo lajat panihnidih ãt jwíih jwejep taga. Jesucristoboó choójboó wêp teo lajni jenah enat jee dáh panihni ã jamna caá.*

* 2:15-16 Col 2.14
Is 28.16; Mt 21.42

* 2:15-16 Col 1.20

* 2:17 Is 57.19

* 2:20

21 Jwiít nihat Jesúsdih jepahnitdih Dios túi jenah ennit, ã dꞑꞑj pǎp aabánit, caandíh weñat pínah mꞑꞑ pánihnidih ã chǎjna caá.

22 Yeebdíhbut túi jenah ennit, biíc yoobó jwíjeéh ã dꞑꞑj pǎp aabáát pah ã chǎjna caá. Pánih chǎjna, jwiít nihat biícđih Túini Espíritu ã jummat mꞑꞑ pánihni jwí jumna caá.*

3

Judíowã nihcannitdih Pablo túini doonádih naóhni ã jummat

1 Páant Dios yeebdíh ã túi teo wáacachah jéihnit, weém, Pablo, yeéb judíowã nihcannitdih Diosdih búdíwã ɯɯbhna caá. Yeebdíh Jesúh túini doonádih wã bohéát jíib nemat mꞑꞑboó ĩ nemni wã jumna caá.

2 Dios weemdíh oi teo wáacnit, weemdíh áih túini doonádih ã naáwát tútup be. Caandíh ñitát joi tágaá.*

3-6 Jon jǎtih ã jenah joyátji pah Dios yeéb judíowã nihcannitdih ã oi teo wáacat pínahdih cǎacwã ĩ jéih jwuhcah yuhna, bꞑꞑ jwuhna weémboodíh Dios ã túi jéihyanap jĩ.* Caandíh yeebdíh wáát naóh daacáp jĩ. Páant wã daacátjidih ennit, “Pablodih Dios át túi jéihyanap taga”, ñi níj jéihbipna caá. Yeéb judíowã nihcannit, jwiít judíowãbut biíc yoobó Jesucristodih jwí jepahachah, jwiít nihat biícđih Dios áihwã pínah ã chǎjna caá. Páant ã chǎjat pínahdih nihat jwí nꞑowã ĩ jéihcah yuhna, bꞑꞑ jwuhna Túini Espírituboó Jesús áih túini doonádih

* 2:22 1Co 3.16-17; 1P 2.4-5 * 3:2 Col 1.25 * 3:3-6 Gá 1.12

naáwát túutnitdih, Dios naáwát dih naóh yapanitdihbut át jéihyanap taga. Yeéb judíowã nihcannit, jwiít judíowã bíicdih, jwĩ yéejat jíib iiguípna jwĩ bejat déedih, Jesucristodih jwĩ jepahat jíib, Dios jwiít dih át túi ubup taga. Pánihna, jwiít nihat bíicdih áih bácah panihni jwĩ jumna caá. Páant jwĩ jumuchah, áih cáacwãdih ã naáwátji pahjeh jwiít nihat bíicdih ã túi chãjbipna caá.*

⁷ Dios weemdih oi teo wáacnit, nin táini doonádih yeéb nihat judíowã nihcannitdih ã naáwát túutap jĩ. Pánih naáwát túutnit, Dios ã wêpatjĩh weemdih ã jéihyanap jĩ, wã túi naáwát pínah niijná.

⁸ Nihat Jesúhwãdih jenah joinít, oboh jumni wã jumuchah yuhna, Diosboó weemdih búdí ã oi teo wáacap jĩ, judíowã nihcannitdih Jesucristoíh túi doonádih wã naáwát pínah niijná. “Jesucristodih ñi jepahachah, Diosboó yeebdih búdí ã túi chãjbipna caá”, wãpĩ niij naóh bohéna caá.*

⁹ Pánih táini doonádih bohéna, Dios nihatdih chãjni, ded pah ã jenah joyátji ã jéihya jwahca naáhdih buu nihat cáacwãdih wã túi jéihyana caá.

¹⁰ ¿Pánih chãjna, ded panihat pínahji ta tigaá? Dios nihat cáacwã, bita poómpna jumna yuhna, Jesucristodih ñi jepahachah, bíicdih áihwã pínah ã chãjachah ennit, nihat áih ángelwã, nihat nemépwãbut Dios chah ã túi jéih beedáatdih ñi jéihyat pínah niijná, páant át chãjap wat jĩ.

¹¹ Dios bíihmah páant ã jenah joyátji bíic yoobó, jwĩ Maáh Jesucristo ã wun wãhatjijĩh át chãj beedánap wat jĩ.

¹² Pánihna, Jesucristodih jepahnit, áihwã jumna,

* 3:3-6 Col 1.26-27 * 3:8 1Co 15.9

úumcanjeh, “Weemdíh ã túi joiná nacaá”, niíj jéihnit, Diosdih jwĩ túi jéih úúbhna caá.

¹³ Pánih jumnit, yeéb judíowã nihcannitdih táini doonádih wã naawát jíib weemdíh yeejép yapat doonádih joinít, ñi jĩgahca bojoó. Yeebdíh jĩgahaat pínah nihcan, Diosjeéh ñi túi jummat pínah caá. Pánihna, caandíh jenah joinít, ñi túi weñeé.

Jesucristo ded pah ã oyat

¹⁴ Yeéb judíowã nihcannit, jwiít judíowã biíc dih Jesucristoíhwã jumna, jwĩ íp dih bódicha caj yoh ñajnit, yeebdíh búdí wã úúbhna caá.

¹⁵ Dios ã pebh jumnitdih, nihat nin baác dih moondíhbut mácah poómp jwĩ jumuchah yuhna, áihwãdih biíc weh pah át chãjar wut jĩ. Pánih chãjna, jwiít dih áih wut át búudhdap wut jĩ.

¹⁶ Pánihna, nin pah yeebdíh jwĩ íp Diosdih wãpĩ niíj úúbhna caá: “Paá, meém chah wẽpni jumna, Túini Espíritujĩh queétdih búdí ma teo wáacá,

¹⁷ queét Cristodih ĩ túi jenah joyóchah, áih muu pánihni, ĩih caolihboó ã túi jummat pínah niijná. Pánih jumna, túi oinit, ded pah chãjna, ĩ chãja naáh. Maa náatna baác namah bejna, buujcán ã túi tewat dée pah, queétdih túi oinit ĩ jumna naáh, táinijeh ĩ chãjat pínah niijná”, wãpĩ niijná caá.

¹⁸ Nin pahbut wãpĩ niíj úúbhna caá. “Paá, Cristo ã oyat ded pah búdí ã jummatdih queétdih, nihat bita míihwãdihbut, ma túi beh joyánaá.

¹⁹ Jwĩ jéih beh joí beedácah yuhna, ma teo wáacá, búdí ã oyatdih ĩ jéihyat pínah niijná. Páant ĩ jéihyechah, ded pah ma túi jéih beedáatdih, ma oyatdihbut queétdih búdí ma jéihyanaá, ma náahat

pah ì táí chãjat pínah niijná”, jwĩ ípdih wãpĩ niijná caá.

²⁰⁻²¹ Ded pah Diosdih jwĩ úbát dih, jwĩ jenah joyát dihbut caán chah búdí ã jéih chãjna caá. Páant caán chah wēpni jumna, jwĩih caolih diítboó Túini Espíritu ã wēpatjĩh jwiít dih búdí ã jéih teo wáacna caá. Páant ã chãjachah, nihat cãacwã, buu láa moón, túttimah bóo láa moonbút caandih búdí ì weñe naáh. Ded pah nihat áihwãdih búdí ã teo wáacatdih ennit, ded pah Jesucristo ã táí chãj wãhatjidihibut ennit, Diosdih páantjeh weñat caá náahap. Páant tíí ã jumna nah.

4

Jwiít Cristoíhwã bíicdih ded pah jwĩ jumna

¹ Yeéb judíowã nihcannitdih wã bohéat jíib nemat muúboó jumna, nin pah yeebdih wã wutna caá. Yeéb Dios ã ñíonit jumna, táinijeh jumna caá náahap.

² “Weém oboh jumna caá”, niij jenah joinít, bitadih jũihcannit ñi jumna. Bita yeebdih yeejép ì chãjachah yuhna, queétdih íjcanjeh oinit, ded pah ì chãjatjidih ñi jwũub náhnica bojoó.*

³ Pánih jumna, yeéb táí bíicdih Túini Espíritu ã chãjatjidih ñi yéejacan niít. Túí bíicdih jwĩ jumna pínahdih jwiít Dioíhwãdih búdí bidat caá náahap.

⁴ Jwiít nihat bíicdih Jesucristoíh bácah panihni-jeh jwĩ jumna caá. Jwiít nihatdih Dios ã wahni Túini Espíritu bíicjeh tigaá. Jwiít nihat Dios ã ñíonit ã pehbóo jwĩ bejat pínahdih bíic yoobó jwĩ páina caá.

* **4:2** Col 3.12-13

5 Caán biíc Jesússeh tigaá jwĩ Maáh. Caán Jesúsdiheh tigaá jwiít nihat jwĩ jepahap be. Jesúsdiheh jwĩ jepahat júatna, biíc yoobó daabánit jwĩ jumap be.

6 Caán biíc Diosjeh tigaá jwiít nihatdih jáap caolih dée át chãjap taga. Pánih chãj wũhna, jwiít nihat jwĩ íip jumna, jwĩ Maáh caá. Á maáh jummat nihat chah ã wẽpna caá. Pánih jumna, jwiít nihatdih ã teo wáacna caá, ã weñat pínahdih jwĩ tái chãjat pínah niijná. Jwiít nihat cãtíh ã jumna caá. Páant ã jumuchah, biíc weh dée pah tái jummat caá jwiít dih náahap.

7 Obohjeéhtih, biíc weh dée jwĩ jumuchah yuhna, ã náahat pah mácah jéihyatnadih jwiít nihatdih Cristo át wũhup taga.

8 Pánihat pínahdih jenah joinít Davidjiboó nin pah át niíj daacáp tajĩ:

“Caandíh eníhcannitdih yap yohnit, Dios pebhboó ã jwũub pũuh laáb juibíát túttimah, áihwãdih túinidih át wũhup taga”, át niíj daacáp tajĩ.
(Sal 68.18)

9 Pánihna, “jwũub pũuh laáb juibíát”, ã niijíchah, “Nin baácboó jumnit, caandíh eníhcannitdih ã yap yohat túttimah, wannitji í jumapboobút át dei bej jwũhup wat jí”, jwĩ niíj jéihna caá.

10 Pánih caanná dei bej jwũhni, nihatdih maáh jummat túut niijná, Dios pebhboó át jwũub pũuh laab béjep wat jí.

11 Pánih pũuh laab béjnit, áihwãdih Túini Espíritudih wah deyana, mácah jéihyatnadih át wũhup taga. Biquínadih Jesúih túini doonádih naóh peetát pínah jéihyatdih át wũhup taga. Bitaboodíh

Túini Espíritu ã naáwáchah joinít, naóh yapaat pínah jéihyatdih át wāhup taga. Bitaboodíh Jesúíh túini doonádih jáap joinít ĩ túi jepahat pínah niijná, wēp naáwát pínah jéihyatdih át wāhup taga. Bitaboodíh Dioíhwādih duó wáinit, ã naáwát dīh ĩ túi bohéat pínah jéihyatdih át wāhup taga.

¹² Pánihatdih Cristo jwiít áihwādih át túi wāhup taga, Dios ã weñat pínahdih chājnī, jwī túi míc teo wáacat pínah niijná. Pánih míc teo wáacna, ded pah Dios ã chājat túutuchah, jwī túi jéih chājna caá. Pánih jumna, jwiít nihāt bíicdih Diosdih jwī chah túi jenah joibípna caá. Jwiít Cristoíh bācah panihni jumna, wébít ã behat dée pah, bíicdih jwī túi behbípna caá.

¹³ Pánihna, jwiít Dioíhwā túi behna, Jesús Dios wāúhdih chah jenah joinít, jwījééh ã jumatdihbut chah jéihnit, bíicdih jwī túi jumbípna caá. Pánihat túttimah, túi behnit dée pah jumna, Jesucristo ã jumāt pah mātīh jwiítbut jwī jumbípna caá.

¹⁴ Pánihna, Jesucristo ã wāhni jéihyatnajīh túi míc teo wáacna, wébít dée jwī jumcan níit. Wébítboó dedé naáwát dīh joinít, ĩpī túi joiná caá. Pánih joiná, bita queéd dīh yeenit yeejép ĩ chājat túutuchah, ĩ jepahna caá. Bita Dios naáwát dīh ded pah mácah ĩ yee naáwáchah, ĩpī túi joiná caá. Cāac wihcanni jāáj chóo dée pah ĩ jumna caá. Íim tac yoób pahachah, johlit nolihatbut caán chóodih ã wénoh johochah, yoobópdih ã bejcan caá.

¹⁵ Jwiít dīh pánihat dée jumcat caá náahap. Dios yoobópdih naóhni ã jéih yeecan caá. Páant ã jumuchah, ã naáwát dīh joí cádahcan, ded yee naóhnt dīh joyáh bojnit, bitadīh oinit, yoobópdih

naáwát caá náahap. Pánih jumna, Dios ded pah jwiít dih ã chãjat tútat dih túi beh joinít, beh bejnit dée pah, yeó jáap jummat pah jwĩ Maáh Jesucristodih chah jwĩ túi jenah joibípna caá. Caán jwĩ Maáh jumna, wao dáh panihni caá.

¹⁶ Jwiítboó ãih bácah panihni caá. ãih maj nah, ãih téihya, ãih jítcha, ãih tãah panihni jwĩ jumna caá. Cãaquih bácah túi dũj ñúhna, ñeh tōpna túi wēpna, ã túi jumna caá. Pánihat dée, jwiítboó túi biíc dih míc oinit jumna, jwĩ túi jumna caá. Pánih míc oina, mácah jwĩ jéihyatnajih míc teo wáacna, beh bejnit dée pah, Dios ã weñat pínahdih biíc dih jwĩ túi jéih chãjna caá.*

Jwiít Cristoíhwã jumna, túiniboodih jwĩ tútat numát

¹⁷ Jwĩ Maáh ã naáwát tútatji pah yeebdih wã wēp watna caá. Ñi déewã Diosdih jéihcannit ã chãjat dée pah, yeéboó ñi chãj cáda haá. Queétboó túi jenah joicánnit, tubit yeejép ã chãjna caá.

¹⁸ Ded pah Dios ã jummatdih beh joicán, dupúat panhipboó jumnit, Diosdih yuúp pah ã jumna caá.

¹⁹ Dios ded pah queédih ã wutuchah yuhna, queét jéih joicánnit panihnit ã jumna caá. Pánih joicán, tíic jenah joicánjeh, ã yéej chãjatdih cádahíhcan, chah ã bidna caá.*

²⁰⁻²² Obohjeéhtih, Cristoíh túini doonádih bita yeebdih ã túi bohénachah joiná, bita yeejép chãjnit pah jumcan, Jesús ã jummat pah yeebdih ã jummat tútat tají. Máa yéguehdih yohat dée pah, jãtíh ñi yeejép chãjatjidih cádahat pínah niijná, ã bohénap

* **4:16** Col 2.19 * **4:19** Ro 1.21-25

tajĩ. “Jwiít yeejép chãjnit, bádí jwĩ wēibipna caá”, jãtĩh ñit niíj jenah joyóp ta yah jĩ. Obohjeéhtih, wēican, chah yeejép chãj bejna ñit chãjap tajĩ.*

23 Pánih yeejép ñi jenah joyát dih cádahnit, túiniboodíh túut nuumná, Dios ã weñat pínahdihjeh jenah joyát caá náahap.

24 Páant niíj jenah joinít, túiniboodíh ñi chãj bípna caá. Dios ã jummat pah jwĩ jummat pínah niijná, jwiít dih jáap dée át chãjap taga. Páant ã chãjachah jéihnit, jwiít dih túi chãjat caá náahap.*

25 Ñi yeeat dih ñi cádahaá. Jwiít bíic bácah panihnit jumna, míic yeena, jwiít míicjeh jwĩ míic yéejana caá. Pánihna, yeeceanjeh, yoobóp dih míic túi naáwát caá náahap.*

26 Bitadĩh íjna yahna, yeejép ñi chãjca bojoó. Caán yeó jáapjeh ñi íj cádahaá.*

27 Ñi íjat dih quíib buudcán, nemép ã náahatboodíh ñita chãj tagaá.

28 Ded nuumní ã nuumát dih ã cádaha naáh. Nuumcánjeh, ded moh yéejnidih teo wáacat túut niijná, túinidih ã tewe naáh.

29 Í náah jumni naáwát dih ñi míic naóhca bojoó. Túi míic teo wáacat túut niijná, túiniboodíh jeh ñi míic naáwá.

30 Jwiít Dios pebhboó jwĩ bejat pínahdih jwĩ jéihyat pínah niijná, Dios Túini Espíritu jwiít dih át wahap taga. Pánihna, yeejép chãjna, caandíh ñi jĩgahaca bojoó.

31 Bita yeebdíh í túi chãjcat dih jwúub náhnican, ñi quíib buudá. Páant ñi quíib buudcáh, maiwã

* 4:20-22 Col 3.9 * 4:24 Gn 1.26; Col 3.10 * 4:25 Zac 8.16; Ro 12.5 * 4:26 Sal 4.4; Stg 1.19-20

man pah ñi íjat yeebdíh ã yéjabipna caá. Pánih íj yapnit, ñi míic jūih ñaacát dih ñi cáda haá. Bitadih yeejép dooná ñi naóhca bojoó. Dedé yeejép ñipí míic chājat dih ñi cáda haá.

³² Pánih cádahna, yeéb míicjeh oina, jīgah ennit, ñi táí míic teo wáacá. Yeebjéh ñi míic yéj chājatjidih ñi míic ámohoó. Diosboó jwī yéejat dih ã yohat pínah niijná, Cristo jwiít dih át wun wūhup wut jī. Páant ã yohat pah, yeebbát bitadih ñi eníhcat dih yohat caá náahap.*

5

Dios weh jumna, ded pah jwī jumt

¹ Jwī weh jwiít dih ennit, bíic yoobó í chājat dée pah, Dios weh ã oinit jumna, caandíh jenah joinít, bíic yoobó ñi jumú.

² Pánih jumna, Jesucristo jwiít dih ã oyat pah, bitadihbut ñi táí oyoó. Pánih búdí oinit, jwī yéejat jíib, caán jwiít dih át wun wūhup wut jī. Judíowã Dios ã weñat pínah niijná, caandíh oveja wūhūdhíh ípí mao cáo wūhup jī. Páant í mao cáo wūhat dée pah, Jesús jwiít dih át wun wūhup wut jī.*

³ Jesúíhwã jumna, dedé íí náah jumnidih ñi chājca bojoó. Pánih chājatdihbut ñi jenah joicá bojoó. Bitáih bíí déedihbut ñi en ñinahca bojoó. Páant ñi chājcah, yeebdíh dooná ã wihcan níit.

⁴ Dedé íí náah jumnidih míic niijcán, jenah joicánnit pahbut míic wéhecan, ñi míic yeejép deoh naóhca bojoó. Dios táini ã jumuchah, áihwādhíh táini jeh míic wéheat caá náahap. Pánih míic wéhena,

* **4:32** Col 3.13 * **5:2** Ex 29.18; Sal 40.6

“Jwiít dih ma túi chājna caá”, Diosdih niiját caá yeebdih náahap.

⁵ Nindih ñi túi náhninaá: Ded íí náah chājni, ded íí náah chājat jenah joiníbut Dios pehbboó ã waadcán niít. Ded dawá bíí déedih en ñinahnitbut ã waadcán niít. Pánih en ñinahni bíí déedihjeh wēinit, Diosboodíh ã jéih wēican caá. Pánih chājni Jesucristo ã maáh nihcah, Dios maáh ã jumapboó ã juibícan niít. Pánihatdih yeéb ñi túi jenah joyoó.

⁶ “Páant ñi chājachah, ã túina caá”, ded ã niúj yee naáwáchah yuhna, yeébboó ñi joyáh bojoó. Pánih yeejép chājnit Dios ã wutadnih í yap yohatji jíib, búdí íjnit, queétdih ã peéh chājbipna caá.

⁷ Pánih yeejép chājnitdih ñi pej jumca bojoó.

⁸ Diosdih ñi jepahat pínah játih, túi chājcan, dupúát panhipboó ñit jum jwuhap taga. Obohjeéhtih buu, Jesucristodih jepahna, baabát panhipboó ñi jibna caá, buca. Pánih jumnit, túinijeh ñi chājaá.

⁹ Baabát panhipboó jumna, túinijeh ñi jumtipna caá. Yeeceanjeh, yoobórdih ñi naóhbipna caá.

¹⁰ Dios ded pah ã weñat pínahdih ñi bidíí.

¹¹ Diosdih náahcannit dupúát panhipboó jumna, yeejép í chājat pah yeébboó ñi chājca bojoó. Páant í túi chājcatdih ennit, Dios naáwátdih naóhna, “Páant ñi chājachah, ã túican caá”, queétdih ñi niijí.

¹² Cāacwā í encah, queét yeejép wā tubit yeejép í chājatdih bitadnih míic wéhena, jwíta tíic tagaá.

¹³ Queét yeejép chājnitdih Dios naáwátdih naóhna, jiiátjñh jii bídat pah chājna, í chājat yeejép ã jummatdih queétdih jwí jéihyana caá. Páant í yeej chājatdih jwí jéihyanachah, í túut numbípna caá.

Pánih túut nuumnít, baabát panhipboó ï jumbipna caá.

14 Pánihat pínah caá nin pah jwĩpĩ niij ewep:
 “Ëoni panihni, ma jáa bojoó. Wunni panihnibut,
 ma boo pud júwú. Meém yeejép chãjni
 baabát panhipboó ma jumat pínah niijná,
 ma túi chãjat pínahdih Jesucristo meemdih ã
 jéihyabipna caá”, jwĩ niijná caá.

15 Pánihna, ïñi túi chãja chaáh! Jenah joicánnit
 pah jumcanjeh, túi jenah joinít ñi jumú.

16 Bú lóa cãacwã tubit yeejép ï chãjachah,
 yeéboó yeó jáap jumat pah Dios ã weñat pínahdih
 jenah joinít, túinijeh ñi chãjaá.*

17 Pánih jenah joicánnit jumcan, Dios ã weñat
 pínahdih ñi túi beh joyoó.

18 Ñi weñat pínahdih bidna, babh máihca bo-
 joó. Máihnit, ñi jenah joyátdih, ñíh bácahdihbut ñi
 yéejana caá. Yeejépdihbut ñi chãjna caá. Máihñat
 yeebdih yeejép wutni dée caá. Obohjeéhtih, Túini
 Espíritu ã túi teo wáacat pínahdih búdí ñi bidíi.
 Caán ã wũhni weñat pínahdihjeh ñi bidichah,
 caánboó yoobópdih weñat ã wũhbirna caá. Caán
 túiniboodíhjih wutni caá.

19 Míc wéhenit, Diosdih ñi weñeé. Pánih wēina,
 David ã daacátjidih, bita ï daacátjidihbut eonit,
 Túini Espíritu ded pah ã jéihyanachah, caandíhbut ñi
 eweé. Caolih díitboobút caandíh wēinit, ñi eweé.

20 Pánih jumnit, yeéb Cristoíhwã ded pah ã ya-
 pachah, biíc yoobó “Ma túi chãjna caá, Paá”, Dios-
 dih niijnít ñi jumú.*

Jesúíhwã áa jumnit ded pah ï jumat

* 5:16 Col 4.5 * 5:20 Col 3.16-17

21 Cristojeéh túi jummat túut niijná, bita Jesúhwã ï jenah joyátdih ï naáwáchah, wěi joinít ñi míc túi jepahaá.

22 Jwĩ Maáh Jesúsdih ñi jepahat dée pah, yeéb yaádhboó ñi weha mánadih ñi túi jepahaá.*

23 Nin pah ã jumna caá: Newé wao dáh panihni ã jumuchah, ãjeéh bóli ãih bácah panihni mi jumna caá. Pánihna, mi áaboó mi maáh panihni caá. Pánihat pah, Cristo maáh jumna, wao dáh panihni ã jumuchah, jwiít ãihwãboó ãih bácah panihni jwĩ jumna caá. Caanjéh jwiít dih túi ubni ã jumna caá.

24 Pánihna, Cristoíhwã jumna, caandih jwĩ túi jepahat pah yadboó mijeéh bóodih jepahat caá náahap.

25 Bũ yeéb neoná áa jumnitdih jwuh wã jwúb naóhna caá. Cristo jwiít ãihwãdih búdí oina, jwiít dih át wun wũhap wat jĩ. Pánihna, jwiít dih ã oyat pah, yeebbát ñi weha mána yaáhdih ñi túi oyoó.*

26 Jwiít ãihwã jwĩ jummat pínah niijná, Cristo jwiít dih wun wũhdih át dei jũwúp tajĩ. Pánihna, ãih túini doonádih joinít, jwĩ jepahachah, yéguehdih jwĩ choc yohat pah, jwĩ yéejatdih át yoh wũhap taga. ãihwã jwĩ jummat jútat pínah niijná, jwĩ daabánap jĩ.

27 Pánih yéejatdih yoh wũhna, jwiít nihat ãihwãdih Dios pehbboó Jesús ã ub bejehchah, túini yoobát yéejat wihcannit, quei wihcannit, wiguihat wihcannit, túi jíghnit jwĩ jumbipna caá.*

* 5:22 Col 3.18; 1P 3.1 * 5:25 Col 3.19; 1P 3.7 * 5:27 2Co 11.2; Ap 21.2,9

28 Cristo ãihwã ãih bácah déedih ãpĩ túi en daoná caá. Pánihat pah, yeéb neoná ñíih bácahdih ñipĩ míic túi en dawát pah, ñi weha mána yaáhdhíh túi en dawát caá náahap. Queétboó ñíih bácah dée jamna, queétdih túi en daonít, ñíih bácahdihbut túi en daoná caá ñi chãjap.

29-30 Jwiít nihat jwíih bácahdih yéejaihcán, caandíh jwípĩ túi chãjna caá. Pánihat pah, jwiít Cristoíhwã ãih bácah dée jwí jamuchah, caanbút jwiíttdih ãpĩ túi chãjna caá. Páant ã túi chãjat pah, jwí weha mána yaáhdhíh túi chãjat caá jwiíttdihbut náahap.

31 Nin pah Moisés ãt níj daacáp tají: “Páant tigaá ded newé yad pínahdih ubna, ã mánadih pah-nít, ãjeéh bólijeéhjeh ã jumbipna caá. Pánihna, queét chénewã jamna yuhna, biíc bácah dée pah í jumbipna caá”, ãt níj daacáp tají.*

32 Páant ã níjádih beh joyát ã buona caá. Obo-hjeéhtih, buona yuhna, yoobópdih ã jamna caá. Nin pah níj naóhna caá ãt chãjap: Jwiít nihat Cristoíhwã ãih bácah panihni jamnit, ãjeéh biíc pah jwí jamna caá.

33 Pánihat dée, yeéb neoná ñi weha mána yaádhjeéh biíc pah ñi jamna caá. Pánih jamnit, ñi weha mána yaáhdhíh túi oyat caá náahap. Yaádhbut ñi weha mánadih túi joyát caá náahap.

6

Í mána í wehjĩh ded pah í jumat

1 Bũũ yeéb wébíttdih jwũh wã jwũũb naóhna caá. Jwí Maáh Jesúsdi h jepahnit jamna, ñi mána

* 5:31 Gn 2.24

ĩ wutuchah, jíponih niijcánjeh, ñi jepahaá. Páant chājatdih yeebdíh Dios ā náah yacna caá.*

²⁻³ Jon jātih Moisés nin pah āt niij daacáp tajī: “Ñi mánadih ñi túi chājaá. Pánih chājna, búdí wēinit, nin baácboó maatápdih ñi túi jum̄bipna caá”, āt niij daacáp tajī.* Páant niij wutna, jwíih láa nin pahbut āt niijíp wut jí: “Páant ñi chājachah, wā niijátji pah yeebdíh wā túi chāj̄bipna caá”, āt niijíp wut jí.

⁴ B_{HH} yeéb ĩ mánadih jw_{HH}h wā jw_{HH}ub naóhna caá. Ñi wehdih t_{HH}bit jūihnit, ñi íjaca bojoó. Obohjeéhtih, oinit, ñi túi wái behanaá. Dios ā weñat pínahdih ded pah ĩ chājat pínahdih ñi bohénaá. Dios naáwát_{HH}dih ĩ joyáh bojochah, ñi túi joyát t_{HH}utá.*

Teo wūh_{HH}nit, ĩ maátabut ded pah ĩ j_{HH}mat

⁵ B_{HH} yeéb teo wūh_{HH}nitdih jw_{HH}h wā jw_{HH}ub naóhna caá. Yeebdíh wutnit ĩ peéh chājat pínahdih ú_{HH}mna, queétdih ñi túi jepahaá. Cristodih ñi jepahat pah, queétdihbut wēinit ñi jepahaá. Yabhcanjeh, queétdih ñi túi teo wūh_{HH}ú.

⁶ Yeebdíh wutnit ĩ enechahjeh túi teona y_{HH}hna, ĩ encah teocannit ñi jum̄ca bojoó. Obohjeéhtih, Cristodih teo wūh_{HH}nit jum̄na, Dios yeebdíh ā náah yacat pah túi wēi chājnit ñi jum̄ú.

⁷ Pánihna, ded pah teo wūh_{HH}na, cāacdihjeh teo wūh_{HH}can, wēinit, jwī Maáhboodíh_{HH}jeh ñi teo wūh_{HH}ú.

⁸ Pánih chājnit, nindih ñi túi náhninaá: Ded pah táini ñi chājachah, Diosbut táinidih yeebdíh ā chāj jw_{HH}ubabipna caá. Ñi teo wūh_{HH}chah, cāacwā

* **6:1** Col 3.20 * **6:2-3** Ex 20.12; Dt 5.16 * **6:4** Col 3.21

yeebdíh jíib wāhna, ĩ wāhcahbut, biíc yoobó Dios táinidih ā chāj jwáubabipna caá.*

⁹ Bũũ yeéb queét ĩ maátadih jwũh wā jwáub naóhna caá. Yeebdíh teo wāhnitdih táinijeh ñi chājaá. “Wā wũtatdih ma jepahcah, búdí wā peéh chājbiipna caá”, ñi niij jāihca bojoó. Nindih ñi túi náhninaá: Jwĩ Maáh Jesucristo, Dios pehbboó jumni queétdihbut ĩ Maáh caá.* Pánihna, yeéb maáta ded pah ñi chājatdih jéihnit, yeebdíh teo wāhnit ĩ chājatdihbut jéihnit, biíc yoobó ñi chājat jíib ā túi wāhbiipna caá.*

Jwiít Cristoíhwā ded pah nemépwādh jwĩ jéih yap yohat

¹⁰ Bũũ yeebdíh péeni wũtatdih wā naáwíhna caá. Jwĩ Maáh Jesús nihatdih jéih beedáni ā jumũchah, jwiít caán biíc dih jumna, caandih túi jenah joinít, nemépwādh yap yohnit jumat caá náahap.

¹¹ Romadih moón soldadowā ĩ maáh nihāt ā wāhni míc maona ĩ jāhat chóodih ĩpĩ duoná caá. Pánihat dée pah yeebbút jwĩ Maáh Dios nihāt ā wāhni jāhat pínahdih ñi ubũú, nemép ā yeeatdih túi yap yohat túut niijná.

¹² Cāacwādhijeh pohba nihcan caá jwiít dih míc mawat panihni ā jumũp. Obohjeéhtih, wépép nemépwādh jwĩ míc maona caá. Queét nihāt jwiít cāacwādh yeejép ĩ wũtna caá. Jwiít Jesúíhwādh chah eníhcan, Dios ā wũtatdih ĩ yap yohat túutna caá.

¹³ Pánihna, ĩtah chóo panihni, nihāt Dios ā wāhni jāhat pínahdih ñi ubũú, nemép yeebdíh yeejép ā

* 6:8 Col 3.22-25 * 6:9 Col 4.1 * 6:9 Dt 10.17; Col 3.25

chãjat túutuchah yuhna, ñi túi yap yohat túut niijná. Pánih chãjna, míic mao péanachah, ñáo jweicánjeh, wêp ñuhnit panihnit ñi jumbipna caá.

14 Túi yap yohnit pínah jumíhna, nin panihnit ñi jumúú: Soldado ãih juyáát tōpjīh ãpī jui wái chéona caá, ãih yégueh chóodih ã túi tewat pínah niijná. Pánihat dée, yeebbút yoobópdih naóhnit ñi jumúú. Soldado ãih tacadihbut ïtah chío ãpī duoná caá, caandih eníhcannit ãih caolihdih ï ñúup chūúacat pínah niijná. Pánihat dée, yeebbút Dios ã wēpatjīh túi yoobópdih chãjat caá náahap, nemépoó ñih caolihdih ã jéih yéejacat pínah niijná.*

15 Soldado ãih jítchadih túi wēpép zapatosdih ãpī duoná caá, ã túi bejat túut niijná. Pánihat dée, yeebbút Dioih túini doonádih ñi túi joí cádahca bojoó, jwī maáhjeéh túi jumnit, bitadih naáwádih ñi túi bejat túut niijná.*

16 Soldado ãih bácahdih jãhat naadih ãpī ubna caá, caandih eníhcannit ïih ñúupat doóbhndih cáo dodhnit, ï ñúupuchah ennit, caán naajīh ã túi míic jãhat túut niijná. Pánihat dée, yeebbút Diosdih túi jenah joí cádahca bojoó, nemépoó chah yeejép ã yee wutuchah yuhna, ñi joyáh bojat túut niijná.*

17 Soldado ïtah waochá páhadih ãpī páahna caá, ãih wao dáhdih ã túi wapat pínah niijná. Pánihat dée, Dios yeebdih ã túi ubatjidih ñi túi náhninaá, nemép ñi jenah joyátdih ã yéejacat pínah niijná.* Soldado íbat naadih ãpī ubna caá, caandih eníhcannitdih ã túi míic mawat túut niijná. Pánihat dée, Túini Espíritu ã teo wáacatjīh ded yeebdih

* 6:14 Is 11.5; 59.17

* 6:15 Is 52.7

* 6:16 Sal 7.13

* 6:17 Is

59.17

yéjaíhndih Dios naáwátdih ñi naáwá,* caandíh ñi táí yap yohat túut niijná.*

18 Páñih jumnit, ded pah ã yapachah, Túini Espíritu ã teo wáacatjĩh Diosdih ñi táí uúbh cádahca bojoó. Páñih uúbhna, ñíih pínahdih uúbhñit, bitaíh pínahdihbat ñi uúbú. Ëonit panihñit jumcanjeh, jáanit panihñit táí jenah joinít ñi jumú. Nihat Jesúíhwādhbat ñi uúbh cádahca bojoó.

19 Páñih uúbhñit, weemdíhbat búdí ñi uúbú, úumcanjeh Jesúíh túini doonádih yoobópdih wā táí naáwát pínah niijná.

20 Caán doonádih wā naáwát jíib nemat múúboó ítah tōpjĩh chéoni wā jumna caá. Páñihna, caán túini doonádih naóhñit, úumcanjeh wā táí wēp naáwát pínah niijná, weemdíh ñi uúbú. Weemdíh páant naáwát caá náahap.*

Pablo ã péé túyat túutat

21 Ded pah wā jumatdih ñi jéihyat pínah niijná, yeeb pébhna Tíquicodih wā wahna caá.* Caánboó Jesúsdiht táí jéihni, jwĩ oini caá. Jesúíh túini doonádih wā naóh jibichah, weemdíh búdí ãpĩ teo wáacna beé. Páñihna, ñi pebhna jubínit, nihatdih yeebdíh ã naóhbiptna caá.

22 Páant ã naáwáchah, wā táí jumatdih jéihñit, ñi jĩgahat ã yayát pínah niijná, ñi pebhna caandíh wā wahna caá.

23 Jwĩ íip Dios, jwĩ Maáh Jesucristo bíicdih yeéb Jesúíhwā ñi táí jumú. Páñih jumna, Jesucristodih táí jenah joí cádahcan, chah míic oinit ñi jumú. Páant ñi jumat pínahdih Dios ã teo wáaca naáh.

* 6:17 He 4.12 * 6:17 Ro 13.12-14; 1Ts 5.8 * 6:20 Col 4.2-4
* 6:21 Hch 20.4; 2Ti 4.12

24 Yeéb nihat jwĩ Maáh Jesucristodih oi
cádahcannitdih Dios ã oyatjĩh ã túi chãja naáh.
Yeebdíh búdí wã túyat túatna caá.
Páant bóojeh tigaá.
Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2